

04.09.2025

UKA2025/78

Inatsisartut Suleriaasianni § 36 naapertorlugu aalajangiiffigisassatut siunnersuut imaattoq matumuuna saqqummiuppara:

Naalagaaffinngornissamut Naalakkersuisoqarfiup taaguutitigut suussusaatalu atorunnaarsinneqarsimanera tulluarnersoq pillugu apeqquteqaat aallaavigalugu oqallinnissamik siunnersuut.

(Inatsisartunut ilaasortaq Aki-Matilda Høegh-Dam, Naleraq)

Tunngavilersuut:

Naalagaaffinngornissaq. Suliassaq taamak pingaartigisoq peqqissaartumik, innuttaasunik peqataatsilluartumik, pingaartitsisumillu ingerlanneqassappat immikkut naalakkersuisoqarfeqartariaqarpoq. Ingammik ullutsinni. Ilaa?

Naalagaaffinngornissamut immikkoortortaqaqarfiup siunertarisimavaa Naalagaaffinngornissaq pillugu oqallinneq inuppaalaassutsillu aalajaallisarnera qulakkiissallugit.

Naalagaaffinngornissaq pillugu anguniakkap innuttaasunit tamanit ataatsimoorussatut anguniagaanikuvoq, innuttaasullu piginneqataanissaat aamma Naalagaaffinngornissap tungaanut suliniutinut akissussaaqataanermik misigisimanissaat pingaaruteqarsimalluni. Suliassaq pingaarutilik alla tassaasimavoq, pissutsit arlallit Naalagaaffinngornerup anguneqarnissaanut attuumassuteqartut erseqqissaassutiginnissaat matumani ilanngullugit tamanna pillugu siunissami aalajangiinnissamut tunngaviusup paasissutissiiffiginerata qulakkeernissaa.

Naalakkersuisoqatigiit Demokraatit, Inuit Ataqtigiit, Siumut – uteqqissavakka, Demokraatit, Inuit Ataqtigiit, Siumut – allallu Naalakkersuisoqatigiinniittut Naalagaaffinngornissamut Naalakkersuisoqarfik peersimagaat, Naleqqamit kukkussutitut paasiuminaatsutullu isigaarput.

Naqqiinnissaa pissusissamisuunnginnerpa? Inatsisartut inersuaani inuiaqatitsinniit alloriaqqissutissat naatsorsuutigineqartut malinnissaannut pisussaaffeqannginnerpugut, uagut maani qinikkat 31 akornanni 29-iusugut, tassa 90% sinnerlugit Inatsisartunut ilaasortat, partiit pappialai naapertorlugit, Kalaallit Nunatta naalagaaffinngornissaanut anguniagaqartuusugut?

Taamaammat toqqortiinnarnagu taaguutaarutikkunnaarlugu, akissussaaffeqanngitsumik naalagaaffinngornissamut ingerlarsorunnaarluta Naalagaaffinngornissamut



Naalakkersuisoqarfiup pilerseqqinnissaa pingaaruteqarpoq. Allatut iliorneq akisussaaffeqanngitsutut iliorneruvoq. Taamaattoqarusunnavianngilarmi ilumoorullugu naalagaaffinngorniarneq anguniaraanni, ilaa?

Qilanaarivara isumassarsianik suliniutissanullu siunnersuutitik partiinit Naalakkersuisuniillu tusarnaarnissara.